



TEKS UCAPAN

**YB DATO' SRI HAJAH NANCY BINTI SHUKRI
MENTERI PEMBANGUNAN WANITA, KELUARGA DAN MASYARAKAT**

**PROGRAM JERAYAWARA KASIH KPWKM
@ADVOKASI ANTIGANGGUAN SEKSUAL**

**PULAU PINANG
6 JULAI 2023 (KHAMIS) / 3.00 PETANG**

Kemaskini 5 Julai 2023

Bismillahir Rahmanir Rahim

Assalamualaikum Warahmatullahi Wabarakatuh,
Salam Sejahtera, dan Salam Malaysia Madani.

(SALUTASI)

LAMPIRAN SALUTASI DISEDIAKAN

(A) **PENDAHULUAN**

1. Alhamdulillah, Segala Puji Bagi Allah SWT, Tuhan sekalian alam kerana dengan rahmat dan izinNya dapat kita berkumpul pada petang ini untuk **Program Jerayawara Kasih KPWKM @Advokasi Antigangguan Seksual.**
2. Pertama sekali, setinggi-tinggi penghargaan kepada Ketua-Ketua Jabatan Kerajaan Negeri Pualu Pinang, wakil-wakil Kerajaan Kerajaan Persekutuan, badan-badan korporat,

persatuan majikan dan sekerja, badan bukan kerajaan (NGO) serta rakyat negeri Pulau Pinang yang turut hadir pada petang ini.

3. Sesungguhnya, kehadiran tuan-tuan dan puan-puan pada petang ini **menunjukkan solidariti, sokongan serta kebersamaan dalam menyokong agenda kesejahteraan masyarakat bagi mencapai persekitaran yang selamat dan kondusif untuk semua.**

LATAR BELAKANG

Tuan-tuan, puan-puan, hadirin yang saya kasihi sekalian.

4. Gangguan seksual boleh berlaku di mana-mana, kepada sesiapa sahaja, tanpa mengira jantina, usia, kaum, atau agama.
5. Menurut statistik yang dilaporkan oleh Polis Diraja Malaysia (PDRM), jumlah kes gangguan seksual yang dilaporkan meningkat dari **378 kes pada 2020 dan seterusnya**

meningkat kepada 506 kes pada 2021. Jumlah kes yang dilaporkan ini adalah melibatkan kedua-dua jantina, lelaki dan wanita. Walau bagaimanapun, data menunjukkan majoriti kes yang dilaporkan **melibatkan mangsa wanita berbanding lelaki.**

6. Isu gangguan seksual harus ditangani dengan serius kerana ianya boleh mendorong jenayah seksual yang lebih serius dan kesannya terhadap mangsa adalah sangat negatif, termasuk trauma dan ketakutan yang berpanjangan.

7. Oleh itu, Kementerian Pembangunan Wanita, Keluarga dan Masyarakat (KPWKM) telah menggubal **Akta Antigangguan Seksual 2022 [Akta 840]**, sebagai suatu **Akta khusus untuk menangani kesalahan gangguan seksual**. Akta ini diharap dapat membantu mangsa untuk tampil melaporkan kejadian gangguan seksual supaya tindakan dapat diambil dengan sewajarnya dan remedi dapat diberikan kepada mangsa.

8. **Penguatkuasaan Akta** ini telah dilaksanakan **secara berperingkat mulai 28 Mac 2023** yang melibatkan takrifan

gangguan seksual dan elemen kesedaran, pendidikan serta pemahaman mengenai gangguan seksual kepada masyarakat.

9. Langkah ini adalah sebahagian daripada usaha Kerajaan untuk **meningkatkan kesejahteraan rakyat, khususnya wanita, dengan menyediakan persekitaran yang selamat dan kondusif.**

(B) **PELAKSANAAN PROGRAM JERAYAWARA KASIH KPWKM**
@ADVOKASI ANTIGANGGUAN SEKSUAL

Tuan-tuan, puan-puan, hadirin yang saya kasihi sekalian.

10. Semasa Sambutan Hari Wanita Antarabangsa pada 8 Mac 2023, **YAB Perdana Menteri telah mengumumkan inisiatif Garis Panduan Pelaksanaan Program Advokasi Antigangguan Seksual.**

11. Ini menunjukkan **kesungguhan Kerajaan yang diterajui oleh Yang Amat Berhormat Perdana Menteri** dalam mencapai kesaksamaan gender dan menggalakkan kesedaran tentang gangguan seksual di kalangan setiap lapisan masyarakat.

12. Manakala, Majlis Pelancaran Program Jerayawara Advokasi Antigangguan Seksual telah dirasmikan oleh YAB Timbalan Perdana Menteri pada 29 Mei 2023 yang lalu sebagai ***kick-off*** dan simbolik **kepada pelaksanaan program advokasi**

pencegahan dan kesedaran antigangguan seksual yang akan dilaksanakan ke seluruh negara pada tahun ini.

Oleh yang demikian itu, program ini bermula di Pulau Pinang dan seterusnya dilaksanakan di seluruh negara. InsyaAllah.

13. Objektif Program Advokasi Antigangguan Seksual ini adalah untuk:
 - (i) **Memberikan pendedahan** dan pengetahuan kepada masyarakat mengenai gangguan seksual;

- (ii) **Menyebarkan pemakaian garis panduan** dan notis antingangguan seksual kepada semua lapisan masyarakat;

- (iii) **Menyampaikan maklumat** berkenaan bantuan dan perkhidmatan psikososial yang disediakan oleh KPWKM terutama dalam menangani gangguan seksual; dan

(iv) **Menjalinkan kolaborasi strategik** dengan semua pihak bagi meningkatkan pencegahan dan kesadaran gangguan seksual.

14. Program ini juga bertujuan untuk memberikan kesadaran, pendidikan mengenai gangguan seksual agar **budaya menormalisasikan gangguan seksual dapat dihapuskan**. Inisiatif yang boleh dilakukan termasuk menyediakan

platform latihan untuk pekerja sosial dan sukarelawan, serta **meningkatkan pengetahuan pekerja di tempat kerja tentang tindakan yang perlu diambil jika ada aduan gangguan seksual.**

15. Di samping itu, pelaksanaan Program Advokasi Antigangguan Seksual ini juga adalah **selaras dengan Akta Kerja 1955 (Pindaan) 2022 yang telah berkuatkuasa pada 1 Januari 2023** yang turut mewajibkan majikan untuk

mempamerkan notis mengenai gangguan seksual di tempat kerja.

16. Justeru, KPWKM telah membangunkan **notis antigangguan seksual** yang boleh dimuat turun melalui Kod QR dan laman sesawang Jabatan Pembangunan Wanita (JPW) untuk dipaparkan di setiap organisasi termasuk premis awam dan swasta.

17. Sukacita saya ingin memaklumkan bahawa Program Jerayawara Kasih KPWKM @Advokasi Antigangguan Seksual ini bertujuan untuk mempromosikan perkhidmatan yang disediakan oleh jabatan dan agensi di bawah Kementerian Pembangunan Wanita, Keluarga, dan Masyarakat melalui pameran dan aktiviti-aktiviti.

18. Antara jabatan dan agensi di bawah Kementerian yang terlibat adalah Jabatan Pembangunan Wanita, Jabatan Kebajikan Masyarakat, Lembaga Penduduk dan

Pembangunan Keluarga Negara, Lembaga Kaunseling Negara, dan Yayasan Kebajikan Negara. Turut bersama dengan KPWKM pada hari ini adalah rakan strategik Kementerian seperti PWDC, PERKESO, FAMA dan banyak lagi.

19. Di sini juga, saya mengalu-alukan dan menggalakkan para hadirin untuk turut serta memberikan sebarang pandangan

dan pendapat supaya dapat kami menambah baik mutu perkhidmatan dari semasa ke semasa.

20. Untuk makluman semua juga, selepas ini akan diadakan berlangsung **Aktiviti Berjalan Bersama: “Katakan Tidak kepada Gangguan Seksual”** yang bertujuan untuk memberi kesedaran tentang bahaya gangguan seksual dan kepentingan melaporkannya.

(C) HARAPAN

Tuan-tuan, puan-puan, hadirin yang saya kasihi sekalian,

21. Saya berharap dengan kebersamaan **agensi Kerajaan, sektor korporat, Badan Bukan Kerajaan (NGO) serta seluruh masyarakat untuk untuk bekerjasama agar** kes gangguan seksual akan dapat dibendung dan sekaligus **menyediakan persekitaran yang selamat kepada bukan sahaja wanita malahan lelaki jua termasuk kanak-kanak dan setiap lapisan masyarakat.**

Beras segantang sudah disukat,
Lalu disimpan di atas para;
Andai seluruh masyarakat muafakat,
Negara damai rakyat sejahtera.

22. Saya sekali lagi ingin mengucapkan terima kasih kepada semua yang hadir pada program petang ini.

23. Akhir kalam, dengan lafaz “Bismillahir Rahmanir Rahim”, sukacita saya melancarkan **Program Jerayawara KASIH KPWKM @Advokasi Antigangguan Seksual.**

Sekian, Wabillahi taufiq walhidayah

Wassalamualaikum warahmatullahi Wabarakatuh.

Dato' Sri Hajah Nancy binti Shukri

Menteri Pembangunan Wanita, Keluarga Dan Masyarakat

6 Julai 2023